

Tsošološa kgwerano le Modimo

Thero mo Joshua 24:14-15

Palo ya Beibele: Joshua 24

Temanathero: Joshua 24:14-15

Ana o na le maikemišetšo a mabotse mo mathomong a ngwaga o mofsa? Maikemišetšo a mabotse a go phela bophelo bjo bo kaone? Maikemišetšo a mabotse a go hlabolla dilo tše dingwe mo bophelong bja gago? Maikemišetšo a go emiša ka dilo tšeo di sa lokago? Ke setlwaedi gore o lebelele dilo tše pele ga ge o ka tšhela mollwane. E ka ba sebaka se sefsa mo bophelong bja gago mohlomongwe o thoma go šoma lebaka la mathomo, goba o ile go nyala, goba o lebeletše go humana ngwana. E ka ba mollwane wo o tšhelago go ya ka boemo bja lefase, bjalo ka go ya lefelong le lefsa. Empa e ka ba gape mollwane go swana le lebakeng la go thoma ngwaga o mofsa. Mo Joshua 24 re humana batho ba Modimo ba Testamente ya kgale ba le mo boemong bja go tshela mollwane o bohlokwa. Mollwane go ya ka mo Joshua a tlilego pheletšong ya bophelo bja gagwe gomme o tlogela boetapele bja gagwe. Maemo a bohlokwa ao Joshua a a šomišago go dira selo se bohlokwa: go tsošološa kgwerano le Modimo.

Tabataba: Joshua o eta batho pele go tsošološa kgwerano le Modimo.

Ana seo se ra goreng – go tsošološa kgwerano? Ke moletlo o o humanago gantši mo Beibeleng. Moshe, mo bofelong bja bophelo bja gagwe, bjalo ka moetapele wa batho, le yena o tsošološa kgwerano le Modimo. Bjalo ka ge Joshua a dira gona bjale, pele a ikela. Moletlo wo o swanago le wo, go na le ka mokgwa wo o dirwago ka gona. Ka bophara o be o lebega ka tsela ye: sa mathomo go na le polelo, bjalo ka ge temana ya bobedi kgaolong ya rena: 'se ke seo Morena, Modimo wa Isiraele, a se bolelago...' se ke seo Modimo a bego a se dira go tloga mathomong. Mo karolong ye Modimo o gopotša batho ka tšohle tšeo a ba diretšego tšona mo nakong yeo e fetilego. Se re se humana mo temaneng ya bobedi go ya lesome le metšo e meraro. Ka morago dinyakwa tša kgwerano di tla latela. Temana ya rena: 14-15. Re humana seo Modimo a se nyakago ka bogolo. Gomme poledišano ya latela magareng ga Joshua le batho, ditemana 16-21, mo di nyakwa di gatelelwago go feta. Ka morago Joshua o tšeiša batho keno, temana ya 22. Mo temaneng ya 23 dinyakwa di boeletšwa gape. Mo temaneng ya 24 batho ba dira tshepišo ya tumelomoka. Gomme, go tšwalela moletlo, re humana mo ditemaneng tša 25-28 dipeakanyo go ya ka mo dipuku le dingwalwa tša kgwerano di tsošološwago.

Re bala gore moletlo o o diragetše mo Segeme. Se e be e se seo semakatšago. Ke lefelo leo morago Modimo a le tshepišitšego ka keno go Aborahama, lebaka la mathomo, gore bana ba gagwe ba tlile go tšea lefase la Kanana. Aborahama, yo a ilego a bitšwa kgole go tloga dinokeng go tšwa nageng ya Uri ya baChaladea. Aborahama, yo a ilego a bitšwa go tšwa go dibetlo, medingwana e mengwe ya thoko ya noka, medingwana ya baChaladea. Aborahama, yo Modimo a mmidetšego gore a tle a mo direle mo lefaseng le. Joshua o dira kgopelo gore go kwagale history ya kgale ya tatago bona Aborahama: Lebelelang, bjale le tlile go hwetša lefase le go tšwa se a tleng sa Morena. Tshepišo ya Aborahama bjale e ya phethagatšwa. EMPA LENA, BATHO BA ISIRAELE, LE TLILE GO DIRELA MANG? Medingwana ya bo tatago lena Aborahama go tšwa mathokong a dinoka, goba Nna, Modimo yo a phološitšego Aborahama a mo tliša mo lefelong le?

Mo temaneng ya rena re humana se bohlokwa seo Modimo a se nyakago go batho: Tšhabang Modimo le mo direle ka botshepegi. Lahlang medingwana yeo bo tatago lena, ba e hlanketšego go tšwa dinokeng le mo la ba le Egipita, gomme le hlankete Modimo. Nyako ye ke poeletšo ya mathomo ya molao: 'O se ke wa ba le Modimo e šele kante ga Ka.' Joshua o kgopela batho gore ba lebelele ditlamorago. Se se tla ka morago ga go bolela history yeo a ba filego yona ka mehlolo yeo Modimo a direlego lebakeng la go feta. Ka mo Modimo a phološitšego batho ba gagwe ka mehlolo. Ge Modimo a re diretše tšohle tše, gobaneng re sa mo direle ka pelo tša rena ka moka?

Ka go tlala tumelo Joshua o re: go dire kgetho ya maleba o ka se kgone go direla Modimo ka bonyane. Gomme ka tumelo o re: nako le nako. E sego bophelo bjo o fišegelago Modimo lebaka le letee mohlala ka morago ga go ipolela tumelo. Empa, o boela morago mo mabakeng mangwe. Aowa, bophelo bjo bo telele bja tumelo e tletšego o phela le Modimo. Nyako ye e tšwa go tšeo Modimo a re diretšego tšona. Ka lebaka la se go molaleng gore a go kgonagale gore batho ba ka tšwela pele go hlankela medimo e mebedi. Isiraele a ka se kgone go bapetša Modimo le medingwana. Medingwana ka lehlakoreng le lengwe la noka e šupa medingwana ya Mesopotamia. Le ke lefelo leo Aborahama a tšwago go lona: Uri. Go molaleng gore batho ba Isiraele ba be ba kgahlwa ke medingwana ya thoko yeo. Ye ke medingwana ya meloko ya bona ya kgole. Empa e sego fela medingwana ye. Bjalo, ka ge re bala mo kgaolong ye, le medingwana ya baEgipita. Lebaka la gore Modimo ka mehlolo ya gagwe o phološitše batho ba gagwe Egipita, e be e se ka lebaka la gore ba hlankela yena. Ba bantši mo go batho ba, mehleng yeo ba bego ba dula Egipita, ba ile ba lebala Modimo wa nnete, gomme ba hlankela medingwana ya ba Egipita. Mo temaneng ya rena re bona gore Joshua ka letšwalo la gagwe o tseba ka ga maitshwaro a batho a go hlankela medingwana, lebakeng le le fetilego, le la bjale. Ga se gore Joshua o be a gatelela batho. Empa, ke ka lebaka la gore o be ba rata kudu, gore a fihlele kgato ye pele ga ge a ithobalela. Bjalo ka moetapele o be a tseba batho ba gagwe. Ka lebaka leo yena – ka go tseba tšohle le lebaka leo – o bolela le batho ba gagwe. O ba kgopela go kgetha. O ka se kgona go dula sebakabakeng. O swanetše go kgetha: o kgetha yo goba yo mongwe. Modimo, goba medingwana. Mohlomongwe ba bangwe ba be ba sa fihlile medingwana ya bona ya go betlwa magaeng a bona. Nagana ka mo mosadi wa Jakobo, Rachele, ka go rata medingwana, o ile a sepela le medingwana ya lelapa ya gabo ge a tloga. Seo o nago le sona: e ka ba medingwana ya go betlwa, e ka ba ditšwantšho tšeo di lego monaganong wa gago, molaetša wa Joshua o bonolo: DI LAHLE!

Bjalo ka ge ke boletše, Joshua o mo bofelong bja bophelo bja gagwe. bjale ka moetapele yo batho ba gagwe ba lego kgauswi le pelo ya gagwe, o šomiša lebaka le ka mafelelo e sego fela go ba gopotša ka ga mahumo a mantši ka go tseba Modimo yo a phelago, empa le bohlokwa bjale baka leo. Kotsi ya medingwana e be e le gona mathoko ohle. Empa e swanetše go ba bonolo: Modimo, ka lebaka la kgaugelo fela, o ba neile lefase le la tshepišo, gomme o na le ditokelo tša go ka direlwa ke batho ba gagwe. kotsi ya medingwana e be e le gona ka gare le go tšwa kantle go tšwa ka gare: kgopotšo ya medingwana ya kgale yeo bo tatagobona ba e hlanketšego Mesopotamia. Gomme le kgopotšo ya medingwana ya Egipita, mo ba dutšego mengwaga e mentši. Empa go be go na le kotsi ya medingwana go tšwa kantle: medingwana, e lego medingwana ya baAmore, bao ba bego ba dula mo lefaseng la bona.

Gomme, go phatlalatša se: kotsi ya tirelo ya medingwana ya kgale, medingwana ya bantle ya botatabo, meleko ya go e tšhaba le go nyaka go kgotsofatša yona, le kotsi ya medingwana e mefsa ya se bjale bjale ya lefase leno. Medingwana ya tšhelete, ya thobalano, bjalo bjalo.

Temana ya bobedi ya palo ya rena, temana ya 15, ke sešupo sa temana ya 14. E phethagatša dinyakwa tša temana ya 14. Batho ga ba dumelelwa go sepela pele ba tšea kgetho. Ana o tlile go hlankela mang? Joshua o dira tšohle tšeo di kgonagalago gore ba ka tšeo kgetho yeo e sego ya maleba. O dira seo ka go tliša ba lelapa la gagwe le yena mo kgethong. Mo temaneng ya 14 re bona gore Joshua o bolela mo legatong la Modimo. Gomme mo temaneng ya 15 Joshua ka boyena o fetola molaetša wa Modimo. O itira mohlala. Molaetša wa gagwe o bonolo bjale.

Le ge o kgetha tsela yeo e phošogetšego – 'Empa ge go hlankela Morena go se maleba go wena' – ga go tsebagale gore se se ka se be le khuetšo mo kgethong ya ka le ba lelapa la ka! Se ga sebe bonolo go lena ka moka: NNA LE BA LELAPA LA KA, RE TLA DIRELA MORENA.

Ga go be bonolo, ga go na lefelo la go sebe le go se kgethe bjale. Ka boteng ga go sa na kgetho. Go na le nyako! Morena ke yena Mong wa lena wa nnete. Go bolela nnete, e be e se taba ya gagwe (Modimo) gobe yo mongwe, goba medingwana. Ka nnete, batho ba direla Modimo, empa mo kgauswi ba be ba direla medingwana. Se ke seo Modimo a bolelago ka sona mo. Go ba le maitshwaro a mabedi. Bjalo ka ge Katikasema e bolela ka ga molao wa mathomo: gore ka lebaka la phološo ya ka ke tlile go kgaogana le go tšhaba bootswa, boloi, ditumelwana...

Go feta mo, gore ke etla go tseba Modimo wa nnete, go tshepa Yena fela, go ipea ka tlase ga gagwe ka boikokobetso le go se fele pelo.

E sego maitshwara a mabedi. Gobane se ke seo bootswa e lego sona: bootswa ke go ba, go ba go thoma selo se sengwe seo o se tshepago go ba go tlaleletša, go Modimo wa nnete, yo a itsebaladitšego go wena ka Lentšu la gagwe (HC Sontaga 34).

Go rena lehono, se ke kotsi e kgolo. Mo mathomong a ngwaga o mofsa, go bohlokwa gore o hwetše karabo ya maleba gape. Bophelo bja gago bo be bo le bjang ngwageng wa go feta? Ana o na le maikemišetšo a mabotse a go phela bophelo bjo bo kaone nageng o mofsa? Ana o ikemišeditše go fetola dilo tše dingwe bophelong bja gago? Ana ke nako ya go tsosološa kgwerano, go wena le go kereke ka bophara? Ana o hlanketše Morena ka pelo ka moka ngwageng wo o fetilego? Goba go be go na le boitshwara bjo bobedi bophelong bja gago, bjalo ka ge go be go diragala Isiraele matšatšing a Joshua. Medingwana ya thoko ya noka, ana o ikemišeditše bjang go yona? Medingwana lehono, dilo tšeo di tšeago nako ya gago: tšhelete, le diphahlo, bojwala (alcohol), mošomo, bowena, kgateleleo ya batho mo setšhabeng... ana o nyaka go ba moKriste yo a nago le phapang? Ana o ikemišeditše yo eta pele? Se ke seo ke se kgethago: nna le ba lelapa la ka, gomme ga re tshwenyeye gore batho ba bangwe ba nagana eng ka rena, re tlile go hlankela Morena fela!

Bana bešo, selo se se nyakega ka bonako mo kerekeng: malapa a ikemišeditše go tšea boemo bjo bonolo. Ba se emele pele gore batho ba bangwe ba dira eng, empa o tšea kgetho ya maleba ka bowena, o tšwela pele ka boikokobetšo. Yo a dikadikago, a ka se kgone go tshela noka. Eta pele: Nna le ba ntlo ya ka, re tlile go hlankela Morena! Bjalo ka batswadi, tšeang ketapele go godiša bana ba lena. Ge go na le mafelo a mangwe go ba bagwera bao ba nago le khuetšo e mpe baneng, tšea dikgato, ba ganetše go ya mafelong ao. O se ke wa ema wa lebelela gore batswadi ba bangwe ba tlile go dira eng. Wena ka bowena o na le maikarabelo a thuto ya boKriste baneng ba gago.

Joshua o be a kgopela batho go ya ka mohlala wa gago. E se go gore o be a kgona tšohle. O be a dira seo a le ka tlase ga Modimo. Joshua o ile a lebelela molao wa mathomo. Hlokomelang medingwana, a tšea lefelo la Modimo goba a tšea lefelo kgauswi le Modimo. Gore badimo bareng, goba medingwana ya bjale bjalo ka tšhelete, bojwala, televisione, dipapadi, mošomo, thobalano, goba tše dingwe. Gabotse molao wa mathomo ke mathomo a melao ka moka. Bjalo ka wa bobedi: direla Morena bjalo ka ge a go laetše e sego ka tsela ya gago. Gomme wa boraro: o kgethe go se bolele leina la Morena ka lefela. Gomme wa bone: o kgetha go hlokomela letšatši la Morena le lekgethwa, o kgetha wena le ba lelapa la gago: re tlile go ikhutša ra se šome ka Sontaga. Re tlile go ya kerekeng ka bopelotshepegi. Gomme ka molao wa bohloko: ke tlile go dira gore bana ba ka ba ithute go hlompha batswadi ba bona. Ke tlile go ba mohlala o mobotse bjalo ka motswadi, ke theetša baetapele le melao ya naga yeo ke dulago go yona. Go ya ka molao wa bo šelela: ke tlile go hlompha bophelo bja motho. Ke tlile go dire ka mo nka kgonago go siriletša bophelo bja ka le bja ba bangwe. Go ya ka molao wa bo šupa: ke tlile go obameloa melao ya Modimo ka ga thobalano. Ke tlile go dira seo ka mediro, ka mantšu le ka monagano. Go ya ka molao wa bo seswai: nka se ke ka utšwa. Ke tlile go hlompha dilo tša batho ba bangwe. Gomme ke tlile go ikemišetša go abelana le bao ba hlokago. Go ya ka molao wa bo senyane: ke tlile go hlokomela leina le lebotse la ba agišane ba ka, nka se bolele dilo tša maaka ka bona. Gomme go ya ka molao wa bo lesome: ke tlile go kgotsofala, go ya ka mo ke nako le tša ka le lefase leo ke dulago go lona, ke tlile go kgotsofalela tšeo Modimo a mphilego tšona, gomme ke sa dume go fetiša le go fetiša.

Bana bešo: ye ke tsosološo ya kgwerano mo ngwageng o mofsa. O swanetše go kgetha lehono. Bjalo ka ge Joshua a boletše bonolo: ga go na kgetho. Obamela Modimo. Tshepa Yena. Obemela melao ya gagwe. ka lehlakoreng la gagwe o tlile go ba yo a lokilego. Amene.

